

蕭定基字守一廬陵人天禧進士累官監察御史裏行蘄州守王蒙正恃勢責賂誣屬縣長死罪詔定基往治遂正其獄除開封府判官遷侍御史宜州蠻爲寇以定基爲廣西安撫蠻不敢動官至淮湘荆湖制置發運副使卒贈兵部侍郎

同上

按宋史蕭服爲廬陵人定基爲服之祖林志乃別隸吉水今改正

歐陽觀字仲賓永豐人與弟暉同登咸平進士歷泗綿二州推官性仁孝歲時祭祀考妣涕泣如初喪治獄明慎矜惻每思求其生後任泰州判官卒以子修貴封崇國公

吉州人文紀略

按林志仲賓作仲實訛白志改正崇國事實具詳文忠

公瀧岡阡表中見藝文志

歐陽暉字日華爲隨州推官治獄之難決者三十六人奇峰

寺僧以奸利致富轉運使命暉籍之僧致白金千兩爲饋

暉笑而却之曰歲大凶汝有積穀六七萬能盡以輸官賑

民則吾不汝籍僧喜諾盡輸之飢民賴以全活知桂陽有

爭舟相毆至死者獄久不決暉出囚飲食之獨留一人曰

汝持匕以左手今死者傷在右肋此汝殺之明矣囚即服

罪歷知黃永二州以都官員外郎致仕

同上

王贇字至之泰和人天禧進士通判信州嘗閱帳籍得隱沒官物數百萬因條上鈎考之法著爲令召進殿中侍御史天章閣待制兼知諫院間因奏事退上顧左右曰五方異稟若南士而有燕趙之氣王贇是也未幾置天章閣直學